

20.06.18

თავმჯდომარე. გმადლობთ. ბატონი რომან გოცირიძე.

რ.გოცირიძე. ბატონო მამუკა, თქვენ არაერთხელ ახსენეთ ბრძოლა ჭარბვალიანობის წინააღმდეგ და ეხლა თქვენ განაცხადეთ, რომ 650000 ადამიანი არის თურმე მევალეთა რეესტრში, მე მინდა დაგისვით კითხვა, რამდენი ათასი ადამიანი იყო ამ სიაში, სანამ არ გაუფასურდებოდა ლარი, ჭარბვალიანობა ვის დროს წარმოიქმნა, რა პასუხისმგებლობა აკისრია თქვენს წინამორბედს, სამ პრემიერ-მინისტრს, რა როლი მიუძღვის ამ 6 წლის განმავლობაში გატარებულ თქვენს პოლიტიკას ვალების დაგროვებაში და ადამიანების გაღატაკებაში. თქვენ ებრძვით შედეგს და არა მიზეზს. ჩემი მეორე შეკითხვა არის ასეთი, რომ არ გაუფასურებულიყო ლარი დაახლოებით 50-60%-ით, იქნებოდა თუ არა დღეს ქვეყანაში ჭარბვალიანობის პრობლემა, ვინაიდან ძალიან კარგად იცის ყველამ, რომ ლარის გაუფასურების შედეგად ადამიანებმა დაკარგეს რეალური შემოსავალი 60%-ით და ფაქტობრივად ვალის გასასტუმრებლად მათ დარჩათ საკუთარი შემოსავლები მინუს 60%, იმათ, ვინც ვალი დაფარა მოაკლო საკუთარ ოჯახს, საკუთარი შვილების კვებას, ჯანმრთელობას და ამ ადამიანებმა გადაინაცვლეს ღარიბთა კატეგორიის რიგებში, რაც დაადასტურა გაეროს ბავშვთა ფონდის კვლევამ. ხოლო, მეორე ნაწილი, რომელსაც შემოსავალი არ ჰქონდა, ან დაკარგა სამუშაო ადგილები ლარის გაუფასურების შემდეგ, უბრალოდ, ვერ გადაიხადა სესხები და აი, ამ არმიაში ჩაეწერა, რომელსაც ჰქვია დავალიანებათა რეესტრში აღმოჩენილი, ასე ვთქვათ, ადამიანები. რომ არ გაუფასურებულიყო ლარი, გვექნებოდა თუ არა ეს სურათი.



20.06.18

თავმჯდომარე. გმადლობთ. გადავდივართ ფრაქციების გამოსვლებზე, ფრაქცია „ნაციონალური მოძრაობა“ ბატონი რომან გოცირიძე. 10 წუთი რეგლამენტი.

რ. გოცირიძე. მოგესალმებით, პატივცემულო დეპუტატებო, დღეს თქვენთვის უნდა იყოს საზეიმო დღე, ვინაიდან ამტკიცებთ ახალ მთავრობას. რატომღაც ცხვირი ჩამოგტირით და რაღაც ტრაურის განწყობაა, ალბათ იმიტომ, რომ მთავრობა არ არის სრულად დაკომპლექტებული, სამი ადამიანი აკლია, არ ვიცით ვინ იქნება მინისტრი, ფიქტიური მინისტრები გვიზის, რომელიც 2-3 კვირის შემდეგ, არ იქნებიან, გვინახია ხომ ფილმები, აი, ფიქტიური ქორწინება და ფიქტიური რაღაც ხელშეკრულება და პირველად დავინახეთ ჩვენს რეალობაში, რომ თურმე არსებობს ფიქტიური მთავრობა. გვიზის მინისტრები და არა და არ არიან მინისტრები, აი, როგორ არის იცით, გახსოვთ გიორგი შენგელაია, რომ თამაშობდა რამ გამახსენა გიორგი შენგელაია, „ქართუმ“ ჩამოართვა ივანიშვილის კრიტიკის გამო სტიპენდიაო, არ ჩამოურთმევია, ხომ, დღეს განცხადება გააკეთა, არა, არ ჩამოგვირთმევიაო იმიტომ რომ ძალიან ცუდი რეაგირება მოხდა საზოგადოებიდან და გიორგი შენგელაია, რომ თამაშობს ფილმში „რაც გინახავს ვეღარ ნახავს“ დაღონებულია პატარძალი, არ მოვიდა და დაუკარით უპატარძლო ქორწილიაო, არა. აი, დაუკარით უპატარძლო ქორწილია, მთავრობა მოვიდა მინისტრების გარეშე. აი,, ეს არის კომიკური ვითარება. მაგრამ რადგან აი, ამ კომიკური ვითარებით დავიწყეთ მოდით მეც თვით კრიტიკული ვიქნები და ჩვენი მთავრობის ერთ-ერთ ,ასე ვთქვათ, კურიოზულ თუ რაღაც ისეთ თემას გაგახსენებთ. როდესაც ერთ-ერთი პრემიერ-მინისტრი, რომელმაც ძალიან დიდი რეფორმები გაატარა ნაციონალური მოძრაობის მთავრობის დროს, რაღაც პერიოდში ჩამორჩა ტემპს, რაღაცეებს ვერ აკეთებდა ისე. შალვა ნათელაშვილმა, იცით როგორი კვიმატი ენა აქვს, მას უწოდა დაღლილი ვირი, ეს იმდენად ხატოვანი გამოთქმა იყო, რომ მივხვდით რომ სანამ ვიღაცა დაღლილ ვირს გიწოდებს ეს მთავრობა დროზე უნდა შეგეცვალა, რას ვხედავთ ეხლა ჩვენ. წარმოგვიდგინეს ახალი ძველი მთავრობა, ახალი კაბინეტი და როგორია ეს კაბინეტი დაღლილი, ენერჯია გამოცლილი,



ქანცაწყვეტილი, მორჩილი, ბედს მინდობილი, არა ფორმალური მმართველის თვალეში მაცქერალი, მორალურად გაცვეთილი. მოკლედ, რომ ვთქვათ მინისტრთა კაბინეტი არის დრომოჭმული და ამორტიზებული. კვლავ შემოგვაჩერეს ძველი მინისტრთა კაბინეტი, კაბინეტი, რომელმაც ნდობა დაკარგა საზოგადოების თვალში. აი, ასეთი მინისტრთა კაბინეტი არის ჩვენს წინაშე დღეს განსახილველად თუ დასამტკიცებლად. სწორედ იმის გამო, რომ მან ნდობა დაკარგა, გამოვიდა ხალხი ქუჩაში, იყო საპროტესტო გამოსვლები და ხალხი მოითხოვდა არა კვირიკაშვილის და ჯანელიძის გადადგომას, არამედ ხალხი მოითხოვდა მთელი მთავრობის შეცვლას. ხალხი, პირველ რიგში, მოითხოვდა ძალოვანი მინისტრების შეცვლას და იმ ადამიანების შეცვლას, რომელმაც უსამართლო და ძალადობრივ სისტემას ჩაუყარა საფუძველი. საპროტესტო გამოსვლების მთავარი ლოზუნგი იყო, სისტემა უნდა დაინგრეს, ძალადობრივი სისტემის შემქმნელები რჩებიან უკლებლივ ყველანი, ძალოვნები, იუსტიციის მინისტრი, ბატონი სოზარი, რომელიც ეხლა შემოვიდა, რომელიც ერთ დროს იყო სასჯელაღსრულების მინისტრი და ხორავას ამბებთან და ხორავას ქუჩის ამბებთან და ბავშვების ამ საზარელ მკვლელობასთან დაკავშირებული ერთ-ერთი პირი, რომელიც დააკავეს 10-დე, დღის წინ სწორედ მასთან მუშაობდა და ირიბად რაღაცით დაკავშირებული, იყო სწორედ ამ მოვლენებთან, ვინაიდან მან მიიღო მონაწილეობა ვანო მერაბიშვილის უკანონო გაყვანაში, და საზოგადოების სამართლიან პროტესტს, თქვენ უპასუხოთ უსამართლოდ და ცინიკურად. ეს არის განახლებული მთავრობა? არ არის დიახ, არ არის. თქვენ გაუშვით „ქართუ“ ბანკის ორი კადრი, „ქართუ-ს“ პრემიერ მინისტრი „ქართუ-ს“ ეკონომიკის მინისტრი ხურდაში მიაყოლეთ იმის გამო რომ კვირიკაშვილთან ახლობლობდა თორემ წესით და ლოგიკით არ უნდა გაგეშვათ და თქვენ ეხლა თქვენს მინისტრთა კაბინეტში ელოდებით, რომელიმე „ქართუ-ს“ ბიჭის თუ „ქართუ-ს“ გოგოს დანიშვნას. იმიტომ, რომ თქვენი კადრების სამჭედლო არის მხოლოდ „ქართუ“ ან „ქართუ“ ჰოლდინგი. მისი, ასე ვთქვათ, ელიტა ბურჯი, თუ ელიტა გურჯი, არ ვიცი რა ჰქვია მაგ ორ სამშენებლო ორგანიზაციას. მთელი ზედა, ასე ვთქვათ, ეშელონი გადმოიყვანეთ ხელისუფლებაში. ზოგი ხართ პარლამენტში, ზოგი რეგიონებ-მინისტრი ღარიბაშვილიც გადააყენეთ და რა ვქნათ ეხლა ეს „ქართუ“ რა, ის არის, რა ჰქვია გასაწელი გარმონი თუ რა ჰქვია უფსკერო ძირი. არც ის გამიკვირდება, ჩემო მეგობრებო, რომ ორი კვირის მერე რადგან



ვიხილეთ ქართუს დაცვა, ჩვენ ვიხილეთ ქართუს პირადი, უკაცრავად, მისი პირადი ექიმი, პირადი ბანკირი, ვიხილეთ უამრავი პირადი და არ არის ეს პირადები, ასე ვთქვათ, გამოლევადია და არც ის გამიკვირდება, თუ მინისტრთა კაბინეტში ჩვენ ვიხილავთ რომელიმე პირად მზარეულს. აი, ეს არის თქვენი საკადრო პოლიტიკა, პირადობაზე აგებული საკადრო პოლიტიკა. რაც შეეხება პრემიერ-მინისტრის ეკონომიკურ ხედვებს, მე განვაცხადე, რომ ახალი პრემიერ- მინისტრი არის ახალგაზრდა კაცი, ძველმოდური იდეებით. მისი ყველა იდეა, რომელიც აქ გაჟღერდა, ეს არის უკან დახევა იმ მოდელისაგან, იმ ეკონომიკური რეფორმებისაგან, რომელმაც საქართველოს მოუტანა სახელი და რომელიც ისტორიაში შევიდა, როგორც ქართული ექსპერიმენტი, რომელმაც შევარდნაძის დროინდელი კორუმპირებული, დანგრეული, ასე ვთქვათ, მოდელი, თუ მოდელს ვუწოდებთ, ფაქტობრივად მოახდინა მისი დემონტაჟი და მოდერნიზაცია და სწორედ ამ მოდელის წყალობით არის ის, რომ აბსოლუტურად არაეფექტიანი ხელისუფლება დღეს ინერციით მაინც მიგორავს და 6 წელიწადია იმდენად მძლავრად ნაშენები ფუნდამენტი იყო, რომ ამ ფუნდამენტმა აი, ასეთ მთავრობასაც კი გაუძლო. ახლა მიადექით და ამ ფუნდამენტს ანგრევთ, შემოგაქვთ უამრავი მარეგულირებელი ორგანოები, 230 უწყება შექმნით, ახლა ისევ ახალი უწყების შექმნა გინდათ, ბატონო პრემიერ-მინისტრობის კანდიდატო, იცით რა არის კომუნისტების დროს რა იყო? აი, სოციალისტურიაო რომ თქვით და აგერ თქვენი სოციალისტები გამოლანძღეთ ირიბად. კომუნისტების დროს თუ არის პრობლემა, პრობლემას უნდა შეუქმნა მისი გადაჭრის სამინისტრო უწყება და იყო ლურსმნის წარმოება გინდა? ლურსმნის წარმოების მთავარი სამმართველო, „გლავ გვოზდ“ ასე ერქვა, გინდა თევზი აწარმოო, უნდა შექმნა თევზის „გლავ... ასე ვთქვათ და თქვენ უწყებების შექმნით გინდათ პრობლემის გადაჭრა და ახლა გვთავაზობთ უნდა შემოვიღოთო ეკო ომბუდსმენი, რა გვარია, გეკითხებით, ენერგო ომბუდსმენი, იცით ვინ არის საერთოდ? ან რას აკეთებს? ან რა გვარია ბიზნეს ომბუდსმენი, იცით იმიტომ, რომ 20-30 დან დაწინაურებული იმაში მერიაში, იცით კი, მაგრამ იცით რას აკეთებს? თქვენ ბიზნეს ომბუდსმენის გაკეთებული საქმე გინახიათ ან ბიზნესის, ასე ვთქვათ ,რაიმე წინ წაწევა? და თქვენ ახლა გინდათ ახალი ეკო ომბუდსმენი შექმნათ, ნაცვლად იმისა, რომ ერთადერთი უწყება, რომელიც დღეს მუშაობს საქართველოში, ეს არის სწორედ ომბუდსმენი, სახალხო დამცველი. ნაცვლად იმისა, რომ მიიღოთ ახალი



კანონი, მისცეთ დამატებითი უფლებები, თუნდაც ეკო კუთხით ეკოლოგიის, თუნდაც ბიზნესის კუთხით, თუნდაც სხვა მიმართულებით და შექმნათ, მართლაც, დამოუკიდებელი ომბუდსმენი, თქვენ ახლა რაღაც ეკო ომბუდსმენს გვთავაზობთ, ხვალ შემოგვთავაზებთ ბავშვთა ომბუდსმენს, რაღაც პრობლემა იქნება და ზეგ შეიძლება შემოგვთავაზოთ ღვინის სმის მარეგულირებელი ომბუდსმენი, ვინაიდან ასე ვთქვათ, ჭარბსმიანობის პოლიტიკა გვაქვს, როგორც ჭარბვალიანობას იტყოდით თქვენ. რაც შეეხება ჭარბვალიანობას, ჩემო ძვირფასებო, ჭარბვალიანობა კი არ არსებობს, თქვენ ახლა საინტერესო კვლევა მომაწოდეთ მსოფლიო ბანკისგან, საქართველოში არსებობს ჭარბფულიანობა, როგორ შეიძლება ადამიანმა აიღოს ვალი ისე თუ მას არ მიაწვდის, ესემესი რომ მოგდით აიღეთ სესხი, აიღეთ სესხი, საიდან არის ეს ფული? თქვენი მავნე პოლიტიკის შედეგია. ხადურმა მოიგონა გრძელი ფულის პოლიტიკა, ფულის დაგრძელების პოლიტიკა, პირველად მესმის, დაგრძელება თითქოსდა მელიის კუდის, ასე ვთქვათ, ასოციაციას იწვევს, რა უნდა დააგრძელოთ, 300 მილიონი მისცა კომერციულ ბანკებს, მილიარდი თითქმის მიეცით, თქვენ ახლა საბიუჯეტო ნაშთების შიდა ვალს იღებთ, აძლევთ კომერციულ ბანკებს. 200 მილიონი იყო ორი წლის წინ, ორ მილიარდამდე ასწია ეროვნულმა ბანკმა რეფინანსების სესხები, დაახლოებით სამ მილიარდიანი რესურსი, სახელმწიფო რესურსები, ჩაყარეთ კომერციულ ბანკებში, კომერციული ბანკები იძულებული არიან ან გასესხონ თქვენ საკმაოდ მაღალ ფასებში, ვინაიდან სახაზინო ვალდებულებებს ყიდულობენ ან ასესხონ ადამიანებს და თქვენ შემდეგ იმახით ჭარბვალიანობას. ჭარბვალიანობა კი არ არის, ადამიანის ვალაუვალობა, ვალის დაუბრუნებლობის პრობლემა არის, ამაში გეთანხმებით, მაგრამ ამის წყაროც თქვენა ხართ, როდესაც ლარი გააუფასურეთ 50-60 %-ით, ადამიანებს არ დარჩა ფული უცხოურ ვალუტაში სესხის გასტუმრების, ამიტომ ადამიანის...

თავმჯდომარე. დაასრულებინეთ.

რ. გოცირიძე. და ადამიანებს უკიჟინებთ, რომ ნუ იღებთ სესხებს და თქვენ გამოდიხართ მამა მზრუნველად და ე. ი. შეცდენილი ადამიანების სწორ გზაზე დამყენებლებად, ნუ აიღებთ სესხს. ნურას უკაცრავად, ძალიან ბევრი ადამიანი ცხოვრობს ამ სესხით და თქვენ ათეულ ათასობით ადამიანს, მათ შორის იმ ადამიანებს, რომელსაც ოფიციალური შემოსავალი არა აქვს,



სესხებზე წვდომა აუკრძალეთ. მთელი ეს ეკონომიკური პოლიტიკა, ეს არის წარსული, ეს არის გზა უკან, ეს არის, მართლაც, გზა სოციალიზმისაკენ, ეს არის გზა შევარდნაძისაკენ და ამ გზაზე არ მოგცემთ უფლებას, რომ თქვენ დადგეთ. გმადლობთ.

თავმჯდომარე. გმადლობთ. ფრაქცია „ევროპული საქართველო“-
რეგიონები“, ბატონი ზურაბ ჭიაბერაშვილი, 10 წუთი რეგლამენტი.

